

**Aningaasanoorutit ilaannit iluanaarutinit agguaassisarneq pillugu Inatsisartut Inatsisaatnr.
10, 22. november 2011-meersoq**

Kapitali 1

Agguaanneqartarnerat

§ 1. Aningaasanoorutit ilaat pillugit Kalaallit Nunaannut inatsit naapertorlugu pissarsiassat ukiumoortumik Kalaallit Nunaannut pisassanngortinneqartartut Naalakkersuisut tamanut iluaqutaasussamik siunertanut makkununga agguaatissavaat:

- 1) 50 %-ii timersornernut tamanit peqataaffigineqarsinnaasunut, innarluutillit utoqqaallu timersornerat ilanngullugu,
- 2) 9,1 %-ii piukkunnaatillit pikkorinnerillu timersornerinut,
- 3) 13,6 %-ii meeqqat inuusuttullu peqatigiiffiinut, aamma
- 4) 27,3 %-ii tamanut iluaqutaasussamik siunertanut allanut, taamatuttaaq kulturimut tunngatillugu siunertanut, inunnik qaammarsaanermut siunertanut, nappaatinik akiuiniarnermut pinaveersaartitsinermullu siunertanut, inooqatigiinnermut tunngasunut siunertanut, asimiititsinissanik siunertanut aamma tamanut iluaqutaasussanik ilisimatusarniarluni siunertanut.

Imm. 2. Aningaasat Kalaallit Nunaanni pinnguaatit pillugit naalagaaffimmut akitsuutip 2004-mi atorunnaarsinneqartup annertoqatai siunertanut imm. 1-imi taaneqartunit allaanerusunut atorneqarsinnaapput.

Imm. 3. Naalakkersuisut aningaasaateqarfinnut suliniaqatigiiffinnullu allanut aningaasanoorutit ilaannit iluanaarutinit tamanut iluaqutaasussanik siunertanut agguaassisartunut imm. 1-imi taaneqartutut tamanut iluaqutaasussanik siunertanut tapiissuteqartoqarsinnaatillugu aningaasanik tunissuteqarnissaq pillugu isumaqatigiissuteqarsinnaapput. Aningaasanik tunissutissatut isumaqatigiissutigineqartut pissarsiassanik ukiumoortumik Kalaallit Nunaannut pisassanngortinneqartunit imm. 1-imi taaneqartunut agguaassisartinnagu ilanngaatigineqassapput.

§ 2. Atugassanngortitat § 1, imm. 1-imi taaneqartut imatut agguaanneqassapput:

- 1) atugassanngortitat § 1, imm. 1, nr. 1-imi taaneqartut Kalaallit Nunaanni Timersoqatigiit Kattuffiannut, timersornernut tamanit peqataaffigineqarsinnaasunut, innarluutillit utoqqaallu timersornerat ilanngullugu, agguaasseqqinnermik isumaginnittussamut agguaanneqassapput,
- 2) atugassanngortitat § 1, imm. 1, nr. 2-mi taaneqartut Elite Sport Greenlandimut, piukkunnaatillit pikkorinnerillu timersornerinut agguaasseqqinnermik isumaginnittussamut agguaanneqassapput,
- 3) atugassanngortitat § 1, imm. 1, nr. 3-mi taaneqartut Sorlammut, meeqqat inuusuttullu peqatigiiffiinut agguaasseqqinnermik isumaginnittussamut agguaanneqassapput, aamma
- 4) atugassanngortitat § 1, imm. 1, nr. 4-mi taaneqartut qinnuteqaateqartoqarneratigut Naalakkersuisunit agguaanneqassapput.

Imm. 2. Imm. 1, nr. 1-miit 3-mut atugassanngortitat taaneqartut agguaateqqinneranni allaffissornikkut aqutsineq Naalakkersuisut tigusinnaavaat imatut pisoqartillugu:

- 1) soqutigisaqaqatigiiffiup Naalakkersuisut taamaaliortoqarnissaanik kissaateqarfigippagit, imaluunniit
- 2) pingaarutilimmik aalajangersimasumillu tunngavilersukkamik soqutigisaqaqatigiiffik suliassaminik isumaginnissinnaajunnaarsorineqarpat.

Kapitali 2

Tapeeriaatsit, tapiiffigineqarnissamut piunasaqaatit aamma periutsit

§ 3. Inunnut nunami maani najugaqartunut imaluunniit peqatigiiffinnut, soqutigisaqaqatigiiffinnut, suliffeqarfinnut, oqartussaasunut il.il. Kalaallit Nunaanni angerlarsimaffeqartunut taamaallaat tapiissuteqartoqarsinnaavoq.

Imm. 2. Imm. 1-imi aalajangersagaq apeqqutaatinnagu Elite Sport Greenland inunnut Kalaallit Nunaata avataani najugalinnut tapiissuteqarsinnaavoq tapiissutisisussat Naalakkersuisunit timersornermut piukkunnaatilittut imaluunniit timersortartutut pikkorinnertut akuersissutigineqarsimappata.

Imm. 3. Imm. 1-imi aalajangersagaq apeqqutaatinnagu Avalak tapiiffigineqarsinnaavoq.

Kapitali 3

Nakkutilliineq misissuinerlu

§ 4. Soqutigisaqaqatigiiffiit § 2, imm. 1, nr. 1-imiit 3-mut taaneqartut kingusinnerpaamik 1. juunimi Naalakkersuisunut ukiumut naatsorsuuteqarfiusumut qaangiuttumut naatsorsuutitik kukkunersiorneqarsimasut naatsorsuutinullu atortussat allat nassiuutissavaat. Naatsorsuutit ukiumi qaammatisiuteqarfiusumi qaangiuttumi atugassanngortinneqartunit agguanneqarsimasut nalunaarsuutaannik kukkunersiuisumit naalagaaffimmit akuerisaasumit imaluunniit naalagaaffimmut nalunaarutigineqarsimasumit atsiorneqarsimasunik ilanggussivigineqassapput.

Imm. 2. Naatsorsuutit, naatsorsuutininut atortussat allat nalunaarsuutillu imm. 1-imi taaneqartut piffissaq eqqorlugu tiguneqanngippata, imaluunniit Naalakkersuisut paasippassuk aningaasanoorutit ilaannit iluanaarutit siunertanut naapertuuttumik, § 1 takuuk, atorneqanngitsut, Naalakkersuisut aningaasanoorutit ilaannit iluanaarutinit soqutigisaqaqatigiiffinnut siunissami akiliutigineqartussat kinguartissinnaavaat naatsorsuutit, naatsorsuutininut atortussat allat nalunaarsuutillu nassiunneqareerserlugit imaluunniit aningaasanoorutit ilaannit iluanaarutit siunertanut naapertuuttumik atorneqarnissaat isumannaarneqareerserlugu. Naalakkersuisut akiliutigineqartussat kinguartinneqarnerannut atatillugu atugassanngortinneqartunik agguasseqqittarnerup allaffissornikkut aqunneqarnera tigugallarsinnaavaat.

§ 5. Tapiissutisisartut soqutigisaqaqatigiiffiillu § 2, imm. 1, nr. 1-imiit 3-mut taaneqartut piunaffigineqarnermikkut paasissutissat atorfissaqartinneqartut tamaasa Naalakkersuisunut nassiuttassavaat, taamatuttaaq qinnuteqaatit, aalajangiinerit, agguassinermut najoqqutassat, ilaasortat amerlassusaat, akiliutit il.il. pillugit paasissutissat.

§ 6. Tapiissutigineqartut tamakkiisumik ilaannakuusumilluunniit utertillugit akileqquneqarsinnaapput, qinnuteqaateqartoq eqqunngitsunik paasissutissiisimappat,

tapiissuteqarnissamut piumasaqaatit naammassineqarsimangippata imaluunniit ingerlanneqartoq sinneqartoofiusimappat.

Kapitali 4

Suliassat suliarineqartarnerat aamma maalaarsinnaaneq

§ 7. Pisortat ingerlatsineranni suliassat suliarineqartarnerat pillugu Inatsisartut inatsisaanni aammalu pisortat ingerlatsineranni tamanut saqqummiussisussaataaneq pillugu inatsisartut inatsisaanni aalajangersakkat § 2, imm. 1, nr. 1-imiit 3-mut soqutigisaqaqatigiiffinnut taaneqartunut atuupput taakku Inatsisartut inatsisaat manna taannalu malillugu malittarisassat atuuttussanngortinneqartut naapertorlugit Naalakkersuisut sinnerlugit aalajangiinissamut piginnaatitaaffilerneqarsimappata.

§ 8. Naalakkersuisut kikkut tapiiffigineqarsinnaaneriniq sinaakktissiat, tapeeriaatsit, tapiisinnaanermut piumasaqaatit aamma tapiinermi atugassarititaasut pillugit erseqqinnerusunik malittarisassanik aalajangersaasinnaapput.

Imm. 2. Naalakkersuisut qinnuteqaatit suliarineqassappata aalajangersimasunik anguniakkat pilersaarutitaannik allaaserinninnernik, aningaasatigut missingersuutiniq, ilaasortat amerlassusaannik nalunaarsuutiniq, suliassatut pilersaarutiniq assigisaannilluunniit uppersaasatit saqqummiussisoqarnissamik piumasaqaateqarsinnaaneq pillugu erseqqinnerusunik maleruagassiorsinnaapput.

Imm. 3. Naalakkersuisut naatsorsuutiniq tunniussisarneq pillugu erseqqinnerusunik malittarisassanik aalajangersaasinnaapput, tamatumunnga ilanngullugu allat § 2, imm. 1, nr. 1-imiit 3-mut soqutigisaqaqatigiiffiit taaneqanngitsut, aningaasanoorutit ilaannit iluanaarutinit pissarsisimagunik naatsorsuutiniq saqqummiussissasut.

Imm. 4. Naalakkersuisut aningaasanoorutit ilaannit iluanaarutiniq § 1, imm. 1-imi eqqartorneqartutut atuisinnaanerup saniatigut atuisinnaaneq pillugu malittarisassanik erseqqinnerusunik aalajangersaasinnaapput tamatumunnga ilanngullugit allaffissornermut aamma paasissutissiinermut atuneq.

Imm. 5. § 2-mi imm.1, nr. 1-miit 3-mut naapertorlugu soqutigisaqaqatigiiffinnit taakkartorneqartunit tapiissutiniq agguaassinermit aalajangikkat pillugit maalaarutiniq suliaqarnissamut Naalakkersuisut malittarisassiorsinnaapput.

Kapitali 5

Atortuulersitsineq

§ 9. Inatsisartut inatsisaat atuutilissaaq 1. januar 2012.

Imm. 2. Inatsisartut inatsisaata atuutilerneratigut tipsernermit lottornermillu iluanaarutiniq agguaassisarneq pillugu Inatsisartut inatsisaat nr. 7, 1. juni 2006-imeersoq atorunnaarsinneqassaaq.

Namminersorlutik Oqartussat, ulloq 22. november 2011

Kuupik Kleist